

**Kementerian perlu dana lebih besar perkemas sistem pendidikan,
kata Muhyiddin
The Malaysian Insider
March 3, 2015
Oleh Hasbullah Awang Chik**

Peruntukan yang diterima Kementerian Pendidikan dalam bajet tahunan kerajaan tidak memadai jika dibandingkan dengan peranan yang dimainkannya, kata Timbalan Perdana Menteri Tan Sri Muhyiddin Yassin.

Beliau yang juga menteri pendidikan berkata, Kementerian Pendidikan memerlukan dana lebih besar bagi memastikan sistem pendidikan negara menjadi lebih berkesan dan mampu diperkemas.

"Kadang-kadang bila kita lihat peruntukan, banyak orang kata Kementerian Pendidikan mendapat peruntukan yang besar. Ya, besar dalam konteks kita membandingkan dengan agensi dan kementerian lain.

"Tetapi tidak sebesar mana kalau kita bandingkan dengan kehendak kita. Tujuan kita untuk menyediakan sebuah sistem pendidikan yang cukup kemas yang berkesan.

"Ini memerlukan dokongan pihak lain termasuklah dana pembangunan yang lebih besar lagi," katanya ketika berucap dalam perhimpunan bulanan Kementerian Pendidikan di Putrajaya pagi ini.

Muhyiddin berkata, walaupun Kementerian Pendidikan menerima peruntukan yang tinggi dalam bajet diumumkan kerajaan, namun kementerian itu berjaya menyalurkan peruntukan itu kepada setiap jabatan untuk dibelanjakan.

"Dalam keterbatasan itu, kita mempunyai tanggungjawab untuk menentukan segala apa yang diperuntukkan kepada setiap jabatan, kita belanjakan.

"Permasalahan kita kadang-kadang tidak dapat dibelanjakan dengan sebaik-baiknya tetapi Alhamdulillah pada tahun lepas kita cipta satu pencapaian cukup baik, hampir 100% (dibelanjakan)," katanya.

Perdana Menteri Datuk Seri Najib Razak ketika mengumumkan Bajet 2015 pada Oktober tahun lalu memperuntukkan RM56 bilion kepada Kementerian Pendidikan.

Beliau yang juga menteri kewangan berkata peruntukan itu adalah untuk membiayai pelbagai program pengajaran dan pembelajaran pada 2015 selain memperkukuh Pelan Pembangunan Pendidikan Malaysia 2013-2025 dengan penekanan kepada pemantapan sekolah yang memerlukan bimbingan dan bantuan khusus.

Katanya, ia merangkumi peruntukan sebanyak RM1.2 bilion untuk Program Transformasi Vokasional dan Teknik (TEVT) untuk meningkatkan pengambilan pelajar memandangkan permohonan diterima jauh mengatasi kemampuan yang

boleh disediakan. – 3 Mac, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/kementerian-perlu-dana-lebih-besar-perkemas-sistem-pendidikan-kata-muhyiddi>